

Minister Dowers ta anuncia 4.5 miyon florin pa renobacion di Scol di Polis

Parlamento di Aruba a continua cu e tratamento di e Presupuesto Complementario 2025. Durante e reunion publico, minister Arthur Dowers (AVP) a hiba palabra pa defende su maneho desde cu a tuma encargo di ministerio di Husticia.

Segun Minister Dowers, ex-Minister Rocco Tjon (MEP) lo a crea un proyecto pa cual e lo a aloca un suma di 4.5 miyon florin pa renobacion di Scol di Polis. Den combersacion cu DOW, nan a indica cu berdad nan a duna informacion pa por crea e proyecto aki pero na final di dia Tjon no a aloca ni un cen pa e proyecto.

Minister Dowers di su banda, si a aloca 1.5 miyon florin pa



e renobacion y modernisacion di Scol di Polis Watty Vos. Den un comunicado di prensa, minister Dowers a pidi ex-Minister Rocco Tjon wak su cara den spiel y wak si e refleho ta esun di un narcista of di un egoista.

Minister Dowers, a splica entre otro cu ta trahando riba e

uzo di “electronische detentie” y cu por usa esaki pa castigonan di duracion di cierto tempo y cu ta hues lo mester dicidi segun cada caso si esaki ta aplicabel pa e persona cu ta haya condena. E proceso pa e proyecto piloto aki ta den man di reclassering y segun nan evaluacion, lo mira den cua caso por aplica esaki.

Ademas, hunto cu stakeholders ta trahando riba maneho pa Directie Justitie. Den pasado a inicia caba cu e proyecto aki y lo continua cu esaki den e siguiente periodo como Minister di Husticia. Directie Justitie lo bay haci un diferencia grandi pa maneho, consistencia y continuidad di maneho den futuro.

Cu tin un falta di personal



den e sector di husticia ta conoci y segun e mandatario di Husticia, e solucion pa e falta di personal ta pa haci un analisis profundo y realoca fondo y personal, pero mester recluta personal nobo den futuro. Minister Dowers a pidi Departamento di Recurso Humano pa haya tur vacatura cu tin habri den e sector di husticia pa haya un bista

cla y si mester, lo wanta cierto vacatura den otro departamento temporalmente pa por enfoca riba e vacaturanan den husticia. Na Brandweer ya ta trahando riba un sistema di shift di 24 ora cu ta crea alivio pa e trahadonan. Locual Minister Dowers a hereda ta retonan di personal den practicamente tur departamento di husticia.

Reaccion di Ex-minister di Cultura tocante rapport di SQS riba funcionamiento di Departamento di Cultura

“Nos a cuminsa tuma e decisionnan necesario pa por cuminsa mehora locual pa hopi aña no tabata bay bon”

E rapport di SQS riba funcionamiento di Departamento di Cultura (DCA) no a “keda scondi.” E ta un rapport traha pa duna e Minister di Cultura un bista amplio y profesional di kico realmente tabata pasando na DCA. Esaki tabata reaccion di ex-minister di Cultura, Xiomara Maduro (MEP).



Basa riba e rapport aki nos a cuminsa tuma e decisionnan necesario pa por cuminsa mehora locual pa hopi aña no tabata bay bon na DCA desde su comienso ora a bin cambio di Instituto di Cultura pa De-

partamento di Cultura, mas di 45 aña pasa.

Pasonan a wordo tuma y hopi mas mester pasa pa asina DCA por bay sostene e industria creativo di Aruba, como parti di e seis (6) sectornan

prometedor pa diversifica Aruba su economia manera splica den e rapport “A strong and resilient economy 2019-2022.”

“Mi ta spera cu Mike Eman



como e Minister di Cultura nobo di Aruba, por sigui traha cu e mesun pasion cu nos a haci esaki pa cultura di Aruba. E investigacion pa mehoracion na DCA ta haci caba, awo Eman por sigui

haci e cambionan necesario na bienestar di Aruba su Cultura y e sector creativo di Aruba,” ta palabranan di ex-Minister di Cultura, Xiomara Maduro.

Salida di wega di Instacash “Instant Jackpot 2”

Lotto, e loteria di Aruba, ta informa cu e wega di Instant Jackpot di 2 florin di Instacash lo sali for di mercado diabierna 29 di aug.

Desde dia 29 di augustus, e wega di Instant Jackpot di 2 florin di Instacash lo sali for di mercado y no lo ta disponibel mas pa wordo compra, si bo tin ticket di Instant Jackpot 2 cu no a wordo cobra ainda lo por hasi esaki na cualkier rebendedo di Lotto

rond di nos isla.

Instacash ta duna bo e oportunidad pa hunga bo weganen preferi manera 5X The Cash, 10X The Cash, 20X The Cash, Bingo, Money Tree, Match for Cash, e famia di Instant Jackpot, Tic Tac Cash, Shooting Star, Buckets of Cash, Strike, Stack-O-Cash, High Voltage Cash y Sevens cu ta dunabo e chens pa gana placa al instante!

Lotto, E Loteria di Aruba tin

diferente wega, Catochi, Big 4, 1-OFF, Zodiac, Wega di Number di Korsou di Lotto, Lucky 3, Multi-X, Lotto di Dia, Lotto 5, Mini Mega y cu su Mega Plus y e diferente weganan di Raspa y Gana y Instacash. Cumprando Lotto bo ta contribui na deporte riba nos isla. E meta ta pa organisa loteria, cambia bida di su hungadonan y na mes momento inverti den deporte local pa medio di donacionnan na e comision di subsidio.

